



JUDICIAL SYSTEM MONITORING PROGRAMME
PROGRAM PEMENTAUAN SISTEM YUDISIAL4



Komunikadu Imprensa

Periodu : Dezembru 2010

Publikasaun : Dezembru 2010

Sorumutu Rede Advogada Feto ho Autoridade Judisiariu Feto

Iha loron 11 fulan Dezembru 2010, liu husi The Asia Foundation organiza soromutu ho Rede Advogada Feto ne'ebé kompostu husi JSMP-VSS, LBH ECM Baucau, LBH Covalima, FFSO Oecussi, inklui mos AATL. Soromutu ne'e prezensa husi jurista feto timorense husi autoridade judisiaria hanesan Juiza Adminstradora Tribunál Distritál Dili, Juiza Adminstradora Tribunál Distritál Baucau, Prokuradora Distritu Dili, Baucau, Suai, no Defensór Públiku, no mós representante espesial husi Embassadora Nasoens Unidas iha Timór no USAID.

Objetivu soromutu ida ne'e hodi introduz kn'ar Rede Advogada Feto liu-liu unidade VSS ne'ebé mak durante ne'e fo assistensia legál ba vítima feto no labarik hodi hametin liu tan rede servisu entre autoridade judisiaria iha sistema justisa formal. Soromutu ne'e ho título "*Natal Almoço*" iha Hotel Timor. Partisipante hamutuk ema tolu nulu (30), ne'ebé kompostu husi Juizes nain 4, Prokuradora nain 6, Advogada nain 14, Defensóra nain 1, no representante espesial nain 5.

Tuir advogda Dra. Merita Correia, husi VSS, nu'udar representante Rede Advogada Feto hateten katak, Rede Advogada Feto ne'e estabelese iha tinan 2009, ne'ebé ho objetivu atu tulun feto maluk sira iha nivel nasionál no mós to'o iha area rurais ne'ebé presiza tebes atu fo assistensia legál. Aliende ida ne'e, atu haforsa assistensia legál husi advogada feto timorense, Rede Advogada Feto mós hala'ó ona estudu komparativu iha LBH APIK Jakarta no Sulawesi; inklui mós iha kada fulan hala'ó enkontru entre membru Rede Advogada Feto hodi fahe informasaun ba malu liu husi apoiu finanseiru husi USAID liu husi The Asia Foundation.

Iha parte seluk, Luis de Oliveira Sampaio, Direitór Ezekitivu JSMP, haktuir katak soromutu ida ne'e nu'udar pasu importante ida ba jurista feto sira atu konsolida-an no tau hamutuk sira nia kbit no matenek hodi ajuda feto maluk sira liu husi sistema justisa formal.

Iha Natal Almoço ne'e, tuir meritíssima Juiza Dra. Edite Palmira dos Reis, Adminstradora Tribunál Distritál Baucau, hato'ó ninia sujestaun ba Rede Advogada Feto katak, diak liu "Rede Advogada Feto" hanaran fali "Jurista Feto Timór Léste", ho razaun katak laos deit kompostu husi advogada feto sira maibé inklui mós juiza, prokuradora, defensóra, no ajente prosesual seluk atu nune'é rede bele forte liu tan.

Husi sorumutu ida ne'e jurista feto timorese sira halo mos diskusaun ba Lei No.7/2010 konaba Lei Kontra Violensia Domestika no mos artigu 145 no 154 husi Kodigu Penal (KP). Rezultadu husi diskusaun ne'e hatudu katak, Lei Kontra Violensia Domestika, hanesan lei foun ne'ebé foin pública iha loron 7 fulan Jullu 2010. Husi perspetiva jurista feto sira katak sira mos seidak iha kuiñesementu diak ba implementasaun lei ne'e rasik. Maibé liu husi oportunidade ida ne'e ho ksolok boot jurista feto timorese ne'ebé hola parte iha sorumutu ne'e, ho hanoin no komprensaun ida deit ba Lei Kontra Violensia Domestika defini ona krime nia natureza hanesan krime públiku, no nia prosedimentu hahu la depende ba keixa.

Sorumotu ne'e mos ajuda klarifika ona konfuzsaun konaba implementasaun ba artigu 145 no 154 KP ba kazu violensia domestika tanba iha ona klarifikasaun katak, artigu rua ne'e implementa bazeia ba gravidade kazu. Sekuandu krime ne'e akontese bei-beik maka foin akuza ho artigu 154 KP maibé karik foin maka akontese dala ida no nia gravidade la maka'as akuza ho artigu 145 KP.

Atu hetan informasaun kle'an favor kontaktu:
Luis de Oliveira Sampaio
Direitor Ezekutivu JSMP
Email; Luis@jsmp.minihub.org
Landline; 3323883/7295795
